

Ano talaga ang tingin ng mga kababaihang Muslim sa *hijab*?

“Madarama ko ang karagandang paggalang sa akin. Mas seryosong nakikipag-ugnayan ang mga tao sa akin, at nadarama kong ako’y ligtas at nakatitiyak kapag ako’y nasa labas.” Gng. Dra. N.Z. Vakil, M.D.

“Sa kasalukuyang modernong lipunan, ang babae ay tinuturing na isa lamang sekswal na bagay para sa kalalakhian. Bakit dapat ilantad ng tao ang kanyang kagandahan para lamang pagpyestahan ng mga malalasang mata? Ang *hijab* ay nangangalaga sa karangalan ng babae at hindi nakakapukaw ng di-nararapat na kahalingan ng kasalungat na kasarian. Nadarama ko na kung ang buong kababaihan ay sumunod sa mga alituntuning Islamiko sa pananamit, magiging bale wala ang proporsyon ng panunudyong, pambabastos, panggagahasa, atbp. Ang pagsusuot ng *hijab* ay nagbibigay sa akin ng karagdagang tiwala sa aking sarili bilang isang babae at ito’y hindi nakakahadlang sa aking propesyon sa anumang paraan.” Gng. Salva I Rasool, Desenyador Grapiko

“Ako’y isang balik-Islam kaya maikompara ko ang mga karanasan sa buhay ng wala at mayroong mabining pananamit Islamiko. Batid na batid ko ang pananaw sa lipunang Kanluran na ang *hijab* ay mapangsupil at hadlang sa kalayaan ng babae. Ang aking karanasan sa *hijab* at pag-aaral sa Islam ay nagbigay sa akin ng pag-unawa na hindi ganoon. Minsan ang mga hindi Muslim ay maaring mapatingin, subalit sa *hijab* ako’y laging ginagalang. Hindi ako nagkaproblemang makakuha ng o manatili sa trabaho. Hindi na ako nakakaranas ng di-nararapat na mga kilos o masasagwang salita mula sa kalalakhian. At nararamdaman kong ako’y mas may karangalan kaysa kapag ako’y walang *hijab*. Natuklasan ko ngayon na maari akong matanggap at makipagsalamuha sa iba bilang ang aking tunay na sarili kapag hindi ang aking anyo ang namamahalang salik. Maging sa mga masamang kapitbahay, ang mga lalaking kadalasang bastos ay hindi pumapansin sa akin. Ang kabuuang konsepto sa pananamit Islamiko ng pagpapanatili ng karapat-dapat na galang at ang aking karanasan na ito ay talagang nagbibigay ng karagdagang magalang na pakikipag-ugnayan ay lumilikha ng karagdagang diwa ng kaligtasan kapag ako’y nasa labas. Dahil sa pagtuklas sa mga naibibigay ng *hijab* sa akin, hindi ako babalik sa dating pamumuhay na wala ito. Lumalabas ako bilang isang kilalang babaeng Muslim – isang paalaala sa akin at sa lahat ng nakakakita sa akin na ako’y nagsisikap mamuhay nang maayos at malinis. Ako’y sumisikap na sumunod sa Panginoon sa lahat ng bagay. Ito ang alam ng mga tao para sa mga madre kapag nakikita sila, at ganito rin ang pagkakaalam nila sa akin. Bagam’t hindi nila maunawaan ang aking mga dahilan sa uri ng pananamit na di-karaniwan dito sa Estados Unidos, hinahangaan nila ang sinumang hindi natatakot mamuhay ayon sa kanyang mga prinsipyo.” Gng. Diana Beatty, Guro

“Naramdaman kong gusto kong sumuot ng *hijab*. Sa katotohanan, “gusto” ay hindi ang tamang salita, dahil ito’y hindi ganap na positibo. Mahal ko ito. Unang karanasan sa aking buhay bilang isang babaeng Amerikano na maramdaman kong ang aking katawan sa wakas ay sariling akin. Tila ba naramdaman kong napasaakin sa wakas ang bagay akin lamang mailarawan, dahilan sa kawalan ng mas mabuting parirala, bilang karangalan ng aking sariling pag-iisang pangkatawan. Natuklasan kong ako’y mabuting pinakikitunguhan, mas ginagalang, at napansin ko ang tahasang kaugalian ng mga kalalakhian, lalung-lalo na yaong mga kabataan, na ako’y pabayaang mag-isa at layuan. Ito’y matinding naganap sa paraang aking natuklasan na ako’y hindi na sinusundan ng mga mata ng kalalakhian. Ang *hijab* ay nagbigay sa akin ng mensahe, hindi lamang matinding, “hindi maari,” bagama’t sa tingin ko ito’y bahagi nito subalit mas higit pa rito...” Isang Amerikanang hindi Muslim na kalahok sa *Scarves for Solidarity Campaign* pagkaraan ng ika- 11 ng Setyembre, sipi mula sa isang liham sa *San Francisco Chronicle*, Mayo 9, 2002.

Para sa karagdagang kaalaman hinggil sa Islam, dumalaw sa:

<http://al-islam.org/faq/>

“At sabihan mo ang mga lalaking nananampalatayang ibaba ang kanilang paningin at maging mabini... At sabihan mo ang mga babaeng nananampalatayang ibaba ang kanilang paningin at maging mabini, at itanghal lamang yaong hayag nilang adorno...”

(Qur’an: Kabanata 24, Bersikulo 30-31)

Bakit ang mga Muslim ay may mga Alituntunin ng Pananamit?

Hindi ipinagbabawal ng Islam sa mga kalalakhian at kababaihan ang makipag-ugnayan, bagama’t pinagbibilinan silang sumunod sa isang alituntunin ng kaasalan na makikilala sa tinatawag na *kabinihan* nang sa gayon, maaring makitungo ang bawat isa nang may ganap at nararapat na pamimitagan.

Ang mabining asal Islamiko ay binubuo ng kabanalan at pamimitagan sa bawat isa, at ng isang pamantayan ng pananamit na madalas nakikilala sa pamamagitan ng mga bandana sa ulong isinusuot ng mga kababaihang Muslim.

Ibaba ang inyong paningin para rin sa inyong kabutihang espiritwal

Ang pilosopiya ng karaniwang tinatawag na *hijab* – mabining pananamit Islamiko – ay nagmumula sa konsepto ng pagbantay sa sariling mga damdamin mula sa anumang nagpapabawas ng kawalang-sala. Sinabi ng Imam ‘Ali, ang pinsan at manugang na lalaki ng Propeta ng Islam (sumakanya at kanyang pamilya nawa ang kapayapaan),

“Ang mata ang espiya ng mga puso at ang mensahero ng dunong; kaya ibaba ang inyong paningin mula sa anumang bagay na hindi nararapat sa inyong paniniwala...”

Lantern of the Path

Sa mundong moderno, ang ating mga pandamdang ay binubomba mula sa lahat ng direksyon ng napakaraming mga tanawin, tunog at ingay, at amoy. Itinuturo ng Islam sa ating pigilin ang anumang naabot ng ating mga pandamdang dahil sa ang ating mga karanasan ay nakakaapekto sa atin sa labas at maging sa espiritwal. Ang amoy ng isang pabango ay maaring magbigay-alaala sa isang matagal nang karanasan ng lola ng isang tao; ang ingay ng mga paputok ay maaring makagulat at mapagkamalang hudayat ng isang digmaan; ang pagkita ng isang magandang babaeng may mapang-akit na damit ay maaring magdudulot ng hindi nararapat na damdaming sekswal.

Kapag ang ating mga pandamdang ay makasaksi ng imoralidad, krimen o kahalayan, bagama’t hindi tayo sangkot, nababawasan ang antas ng ating kawalang-sala. Lahat tayo’y may mga alaalang pagkabata ng sandaling naranasan nating mawala sa atin ang kawalang-sala. Ang bagay na dating nakapanghihilakbot o natatangi ay nagiging ordinaryo lamang.

Sa Islam, hindi para sa mga magulang lamang ang maingat na pagbantay sa kanilang mga anak, bagama’t nararapat din para sa mga may wastong-gulang na bantayan ang kanilang mga sarili. Ang pagpapabaya hinggil dito ay maaring mauwi sa karamdamang espiritwal.

Kaya, ang mas malawakang pilosopiya sa *hijab* ay may kinalaman sa pagpapanatili sa dignidad at kawagasan, at ito’y natutungod sa lahat ng mga aspeto ng buhay. Iwasan natin ang ating mga sarili mula sa malaswang pagtingin sa kasalungat na kasarian, at magbihis tayo ng wasto upang ang iba’y magalang na makipag-unayan sa atin.

Ang wastong pagsagawa ng *hijab*

Tinalakay ng Qur’an ang mabining pananamit Islamiko ng ganito:

“At sabihan mo ang mga lalaking nananampalatayang ibaba ang kanilang paningin at maging mabini. Ito’y mas dalisay para sa kanila. Batid ng Allah ang kanilang ginagawa. At sabihan mo ang mga babaeng nananampalatayang ibaba ang kanilang paningin at maging mabini, at itanghal lamang yaong hayag nilang adorno, at ilagay din ang kanilang mga bandana sa kanilang mga dibdib, at huwag itanghal ang kanilang mga adorno maliban sa [sa mga malalapit na kamag-anak ayon sa paliwanag ng Qur’an]...”

Kabanata 24, Bersikulo 30-31

Ang layunin ng kabinihang ito’y pagpapanatili ng dignidad ng kapwa mga lalaki at babae nang sila’y nakikipag-ugnayan.

- ❑ Una, ang mga kalalakihan ay inuutusang manguna sa paggalang sa mga kababaihan. Hindi sila nararapat na magsagawa o magbigay-pahintulot sa anumang aktibidad na makakababa sa didgnidad ng babae. Pinag-uutusan din silang ibaba ang kanilang tingin nang buong kababaang-loob at sundin ang kabuuang pilosopiya ng kabinihan ng puso at pananamit. Dapat silang magbihis nang tumpak at umiwas sa mga gawain at lugar kung saan masasaksihan nila ang mga bagay na hindi nararapat.
- ❑ Ang *hijab* ay hindi nagbabawal sa mga kalalakihan at kababaihang makipag-ugnayan sa bawat isa hinggil sa pag-aaral, trabaho, pagsasagawa ng mga mabuting gawain, at iba pa. Sa halip, kapag ang *hijab* ay sinusunod ng bawat isa, ang mga pakiki-ugnayang ito ay maisasagawa nang may matapat na layunin at walang anumang masagwa.
- ❑ Nararapat na igtalang ng mga kababaihan ang kanilang mga sarili bilang mga taong may dignidad at makipag-ugnayan sa mga kalalakihan nang matapat. Hindi nararapat nilang baguhin ang kanilang mga kilos sa harap ng mga lalaki upang maging mapang-akit at dahil dito, sila’y maltratuhin.
- ❑ Kapag sila’y nakikipagsalamuha sa mga lalaking hindi malapit na kamag-anak, ang mga kababaihan ay mabining magbihis upang ang kanilang adorno (kagandahan) ay matakpan. Ang mga pantas na Muslim ay nagsasabi nang buong pagkakaisa na ang babae ay dapat na kainamang magtakip maliban sa kanyang mga kamay at mukha. Sinusunod ng mga kababaihang Muslim ito sa pamamagitan ng pagsuot ng maluwang na damit at maglagay ng bandana sa kanyang ulo.
- ❑ Ang mga kinakailangan para sa mabining pananamit ay magkaiba sa bawat kasarian dahil sa mga pangunahing katangiang biyolohiya at panagmumulan ng pang-akit. Mapupuna ang mga katangiang ito sa lipunang Kanluran kung saan mas kaunti ang mga kababaihang nagbabasa ng mga malalalawang babasahin at pumupunta sa mga lugar ng prostitusyon kung iparis sa mga kalalakihang nagsasagawa ng mga ito.
- ❑ Salungat sa ibang mga pananaw, ang *hijab* ay hindi simbolo ng kababaan ng uri ng babae o di kaya’y ipinagpilit sa kanya ng salungat na kasarian. Sa paningin ng Panginoon, ang mga babae at lalaki ay nagkakaiba lamang sa kabanalan ng bawat isa. Kapag sinusunod ang mabining pananamit sa harapan ng bawat isa, sila ay natatangi sa bawat isa sa pamamagitan ng di-pisikal na mga katangian tulad ng dunong at integridad.
- ❑ Ang mabining pananamit Islamiko ay hindi hadlang sa pakikipagsalamuha para sa mga kababaihan sa pamamagitan ng pagkait sa kanila ng malaya at kinakailangang kilos, pagpapahayag ng opinion, edukasyon, ingat pangkalusugan, at ibang karapatang pangtao. Sa halip, ang *hijab* ay tumutulong sa pagtatayo ng isang mabuting lipunan at sa pagbabawas sa dami ng mga krimen tulad ng panggagahasa at molestasyon dahil ang isang posibleng estimulo para sa naturang mga krimen ay mawawala kapag ang *hijab* ay wastong sinusunod. Ang pagsusunod sa *hijab* ay bahagi ng isang malawakang sistema sa Islam na kung isagawa nang wasto ay magpapanatili sa didgnidad ng mga kalalakihan, kababaihan, at lipunan sa kabuuan.